

Date – 17/05/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Mizoram Universal Health Care Scheme (MUHCS) 2.0 atana inziah luh hun tawp ni thleng khan online hmangin chungkaw 46,228 inziaklut an awm.
2. Electoral roll Special Intensive Revision (SIR) tan turin Mizoram a inpeih fel thawkhat tawh.
3. Mizoram Police-in tun hnai khan hmun hniah cheng vaibelchhe 10 leh nuai 60 hu ruihhlo an man.
4. NEET zawhna putru thubuai kaihhnawihah CBI-in Pune-ah mipakhat an man leh.



MUHCS 2.0

Mizoram Universal Health Care Scheme (MUHCS) 2.0 atana inziah luh hun tawp ni thleng khan online hmang chungkaw 46,228 inziaklut an awm a, nikum aiin inziaklut hi a let chuangin an tam zawk ani.

Ziah luh chin MUHCS 2.0 hmang thei hi a mihringah chuan mi nuai 2, sing 1, sang 9 leh 353 an ni a. Tangka kum kal ta (2025-2026) chhunga MUHCS 1.0 kalpui-ah khan kum tluana inziak lut hi chhungkaw 20,213 an ni a, nikum nena khaikhinin kumina inziak lut hi 26,015 in an tam zawk a ni. Hriat theih chinah MUHCS hi mi nuai 12 velin an hmang thei dawn nia ngaih a ni a, Offline-a inziak lut leh Pensioner inziak lut zat hi hriat theih loh la nilo mah se, chhut danin Online-a inziak lut mi nuai 2, sing 1, sang 9 leh 353, AB PM-JAY atanga MUHCS zawm mi nuai 5, sing 9, sang 9 leh 433, sawrkar hnathawkte leh offline leh pensioner te nen mi nuai 12 velin MUHCS hi an hmang dawn niin ngaih a ni.

MUHCS 1.0 ah khan damlo inenkawl senso bill pek theih loh a awm lo a, bill an pe tha a ngaih a ni a, MUHCS zawmtu mimal enkawl damdawiin te pawhin an thatpui niin hriat a ni.



COVID-19

Kumin chhungin Mizoramah Covid hri kai mi 90 an awm tawh.

Covid-19 hri leng a kiang tawha ngaih hnu-ah kumin chhung hian Mizoramah he hri kai hi mi 90 hmuhchhuah an ni leh tawh a. May thla hi hri kai hmuhchhuah thar tam ber thla niin mi 52 hmuhchhuah an ni tawh a. May ni 6-ah ringawt khan Covid-19 hri kai rinhlelh mi 22 endik zingah hri kai 18 hmuhchhuah a ni. Zirtawpni leh Inrinni inkar chhung khan hri kai enkawl mek mi 10 chu enkawl dam an ni a. Tunah hian hri kai enkawl mi 4 an la awm mek a ni.

Kum 2020 tir lama Mizorama Covid-19 hri kai hmuhchhuah a nih hma hret tanga tun thleng hian hri kai leh kai lo mi nuai 19, sing 9, sang 8 leh 592 endik an ni tawh a, an zinga mi nuai 2, sing 3, sang 9 leh 771 te chuan hri an kai tih hmuhchhuah a ni a. Mi nuai 2, sing 3, sang 9 leh 33 te chu an dam chhuak a, mi 734-in an thihphah a ni.



FAMILY WEEK

Mizoram Baptist Kohhran ten 'Kristian Chhungkaw Chawlhkar' an hman chu zanin hian a tiak ang.

Mizoram Baptist kohhran hian May thla chawlhkar hnihna, ni 11 - 17 inkar hi Kristian chhungkaw Chawlhkar atan an hmanga; hemi hun chhung hian chhungkaw tinin thu zir an nei a ni.

Vawiin Pathian biak inkhawm chu Kristian Chhungkaw Chawlhkar thuzir hun niin, hemi pual hian Headquarters atanga thupui thlan “I inah haw rawh” - LUKA 8:38-39 hmangin Pathian thuchah ngaihthlak a ni a, zanin hian “Pathian Ram Chhungkuaah”- Mathaia 6:9-14 tih thu ngaihthlak a ni ang.

Kumin Kristian chhungkaw chawlhkarah hian zirlai paruk a awm a ni.



ARREST

Aizawl Chanmari-a Bike leh Scooter insut avanga NI Zonuntluangi (23) thihnaah mi pahnih man an ni a, nimin khan Central Jail-ah dah luh an ni.

Zirtawpni kalta zana thil thlengah hian NI Zonuntluangi, Thingsulthliah chu a thi a, scooter su tu Bike 2 khalhtu - police in an man te hi Malsawmdawngzuala (18), Bungkawn Vengthar, Aizawl leh Lalnunsanga (26), Zuchhip Veng, Khawzawl tuna (Bungkawn Vengthara awm) te an ni a. Akashavani News Aizawl-in thu a dawn danin, lirthei khalhtute pahnih Malsawmdawngzuala leh Lalnunsangate hi thuzawhfiah an nih hnuah court thupekin Jail-ah dah an ni tawh a. He thil thlengah hian Police te chuan a chhui hna an zo thawkhat tawh a, an chhuina report (chargesheet) pawh court-ah thehlutin, court-in thubuai hi a ngaihtuah ang.



SIR

Electoral roll Special Intensive Revision (SIR) tan turin Mizoram a inpeih fel thawkhat tawh.

Chief Election Officer (CEO) office atanga thudawn danin SIR kalpui hnuhnun ber chu kum 2005 kha a ni a, kum 20 hnu-ah kalpui leh a ni dawn ani. Kum 2005 khan Mizoram electoral roll ah vote nei mi nuai 5, sing 5, sang 9 leh 123 an awm a. Tuna electoral roll thar leh hman lai kum 2025 electoral roll-ah hian vote nei mi nuai 8, sing 7, sang 5 leh 4 an awm mek a ni. Kum 2005 leh nikum electoral roll a chuangte leh an thlah kal zelte dinhmun enfel hna hi Election hotute hian za zela 80 chuang an zo fel tawh tih an sawi a. Electoral roll a bik taka ennawn turah hian lang tlang tak leh mipui rin tawh hlawh thei turin political party-te chu Block Level Agent (BLA) inruat tura hriattir an ni a. BJP chuan BLA 294 an ruat tawh a, Congress-in BLA 1,045 ruat tawhin MNF-in mi 868 an ruat tawh a. ZPM-in mi 1,223 an ruat tawh bawh a, BLA hi a vaiin mi 3,430 ruat an ni tawh a. Aam Aadmi Party (AAP) erawh chuan BLA an la ruat ve rih lo ani.

SIR ah hian vote la nei ngai lo thun thar tura hun bituk chu kumin July ni 1-a kum 18 tling tharte an ni a. Ruahman dan chuan tun thla May ni 30 leh June ni 28 inkar chung hian Booth Level Officer (BLO) te chu an bial chung theuha in tin vawi 3 tlawh chhuakin electoral roll a enumeration form sem leh lakkhawm hna an thawk dawn a. Form dahkhah dan turte an in chung lumah an hrilhfiah ang a, an dahkhah hnu-ah an lakir leh ang a, heta inziaklut ve lote chu electoral roll-ah an tel ve thei dawn lo a ni.

He tih lai hian CEO thar atan Election Commission of India-in Pi Garima Gupta a rawn ruat a. Tunkar chho hian CEO ni mek Dr Lalrozama hnen atangin CEO nihna a la dawn ni a thudawn a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



DRUG HAUL

Mizoram Police chuan tun hnai khan hmun hnihah cheng vaibelchhe 10 leh nuai 60 hu ruihhlo an man.

IGP (Headquarters) leh Mizoram Police department Chief Public Relation Officer Pu H. Ramthlengliana'n a sawi danin kar kalta Nilaini khan, SDPO (Vairengte) kaihhruai Vairengte Police special team chuan N. Chhimluang-ah Ashok Leyland truck pakhat Assam registratrion chu an lo tiding a. Lirthei dangte endik hna an thawh mawlh mawlh lain, he truck driver leh amah puitu te chu an tlan chhe thut a, umzui mah se, man hman an ni lo a ni. Mechanic ruaiin he lirthei hi uluk taka endik a nih hnuah, gear lever bula thil thuhrukna tura bik siam kua (cavities) hmun hnih atangin, heroin gram 900.29 a rit, a hlutna cheng vaibelchhe1 leh nuai 80 hu an hmuchhuak a. He truck leh a khalhtute phone an tlan chhiatsan mobile phone pahnih pawh lak nghal a ni a, Vairengte Police Station-ah ND&PS Act, 1985 section 21(c)/25 hmangin thubuai ziah luh a ni.

Thawhtanni zan dar 8:00 vel khan, rinhlelh thil thu-ah Champhai Police ten Champhai Police Check Gate-ah Sumo pakhat an tiding a. He lirthei Zokhawthar atanga Aizawl pan hian passenger pakhatmah phurh a nei lova, a khalhtu Zardawngkima (36) Tuidil khua, Myanmar tuna Khawmawi, Myanmar-a cheng mek nia inchhal chu an man. Hriatpuitu rinawm tak awm lain uluk taka lirthei hi dapin, bean ip chhunga thuhruk, heroin gram 75 a rit leh theihai dahna bawm chung atangin methamphetamine kg 10 leh gram 818 a rit an hmuchhuak bawk a. Heroin hi tualchhung rate-a chhutin cheng nuai 15 hu a ni a, methamphetamine hi tualchhung rate-in cheng vaibelchhe 8, nuai 65, sing 4 leh sang 4 hu a chhut a ni. Hemi chungchangah hian Champhai Police Station-ah thubuai ziah luh nghal a ni a, ND&PS Act, bakah The Immigration & Foreigners Act 2025 section 21 hmangin thubuai siamsak a n

PEACE

Lunglei North bialtu MLA Pu V. Malsawmtluanga chuan ram a ralmuan loh chuan hmasawna thleng tur ang a thleng thei lo tih a sawi.

Nimin khan Hmar Martarte Ni vawi 36-na Manipur-a Churachandpur Saikawt Playground-ah hman a ni a. He hunah hian HPC Vice Chairman ni bawk Pu V. Malsawmtluanga chuan, ram a ralmuan loh chuan mipuiin an nih tur ang an ni thei lo a ti a, hma an sawn tur angin an sawn thei lova, development chu a kal tur angin a kal thei lo a ni, a ti.

Pu Pu V. Malsawmtluanga chuan Mizoram sorkarin Zo hnahthlakte inuanuna leh inhuho thatna a ngai pawimawh tih sawiin, hnam tobul chhui chhuak tur pawl Chief Minister Pu Lalduhoma hoin din a ni a ti a, hemi kawngah hian tunlai thiamna sang tak hmangin Art & Culture Department-in hma an la mek tih a sawi bawk.



NEET PAPER LEAK CASE

NEET zawhna putru thubuaiah CBI-in he thila inhnamhnawiha puh mi 1, Pune-ah an man leh a, an mi man hi Pune college pakhata Botany zirtirtu, Prof Manisha Mandhare-i a ni.

CBI sawi danin, Prof Mandhare hi NEET exam buatsaihtu, National Testing Agency-in expert atana an ruat a ni. Hemi hma lam hian he thubuaia inhnamhnawiha puh dang, Manisha Waghmare chu tun thla ni 14 khan Pune-ah vek hian man a lo ni tawh a, an 2 hian nimin khan Pune court-ah hruai an ni a, thu zawhfiah chhonzawm turin Delhi-ah hruai leh an ni.

Hetih lai hian CBI chuan ramchhung hmun hrang hrang 6-ah chhui hna, ngawrh takin an thawk chhonzawm zel a ni.

(NSD)

